

Hebel, Johann Peter: Die Irrlichter (1803)

1 Es wandlen in der stille dunkle Nacht
2 wohl Engel um, mit Sterneblume gchrönt,
3 uf grüne Matte, bis der Tag verwacht,
4 und do und dört e Betzit-Glocke tönt.

5 Sie spröche mitenander deis und das,
6 sie machen öbbis mitenander us;
7 's sin gheimi Sache; niemes rothet, was?
8 Druf göhn sie wieder furt, und richte's us.

9 Und wenns so finster wird, wie in're Chue,
10 und wemme nümme sieht, wo d'Nußbäum stöhn,
11 was gschieht? se mü'en die füürige Manne zu,
12 und mü'en den Engle zünde, wo sie göhn.

13 Und iedem hangt e Bederthalben a,
14 und wenns em öd wird, lengt er ebe dri,
15 und biißt e Stückli Schwefelschnitten a,
16 und trinkt e Schlückli Treber-Brentewi.

17 Druf puzt er d'Schnören amme Tschäubli ab;
18 Hui, flackerets in liechte Flammen uf,
19 und, hui, gohts wieder d'Matten uf und ab,
20 mit neue Chräfte, d' Matten ab und uf.

21 's isch chummliger so, wenn eim vorem Fuß
22 und vor den Auge d'Togge selber rennt,
23 aß wemme sie mit Hände trage muß,
24 und öbbe gar no d'Finger dra verbrennt.

25 Und schriket spot e Mensch dur d'Nacht derher,
26 und sieht vo witem scho die Kerli goh,
27 und betet lisli: „Das walt Gott der Her“—

28 „ach bleib bey uns“ — im Wetter sin sie do.

29 Worum? So bald der Engel bete hört,

30 se heimelets en a, er möcht derzu.

31 Der füürig Marcher blieb io lieber dört,

32 und wenn er chunnt, se hebt er d' Ohre zu.

33 Und schritetöbsch e trunk'ne Ma dur d' Nacht,

34 er fluecht und sappermentet: „Chrütz und Stern,“

35 und alli Zeichen, aß der Bode chracht,

36 sell hörte wohl der füürig Marcher gern.

37 Doch wirts em nit so gut; der Engel seit:

38 „furt, weidli furt! Do magi nüt dervo!“

39 Im Wetterleich, sen isch der wiit und breit

40 kei Marcher me, und au kei Engel do.

41 doch goht me still si Gang in Gottis G'leit,

42 und denkt: „Der chönnet bliben oder cho,

43 „ne jede weiß si Weg, und's Thal isch breit,“

44 sel isch 's vernünftgst, und sie lön ein go.

45 Doch wenn der Wunderwitz ein öbbe brennt,

46 me läuft im Uhverstand den Engle no,

47 jel isch ene wie Gift und Poperment;

48 im Augeblick se lön sie alles stoh.

49 Z'erst sage sie: „Denkwol es isch si Weg,

50 „er goht verbey, mer wen e wenig z'ruk!“

51 So sage sie, und wandle still us weg,

52 und sieder nimmt der füürig Ma ne Schluck.

53 Doch folgt me wilters über Steg und Bort,

54 wo nummen au der Engel goht und stoht,

55 se seit er z'lezt: „Was gilts i find en Ort,

56 „du Lappi, wo di Weg nit dure goht!“

57 Der Marcher muß vora; mit stillem Tritt

58 der Engel hinterher, und lauft me no,

59 se sinkt men in e Gülle, 's fehlt si nit.

60 Jez weisch di B'richt, und jez chasch wieder goh!

(Textopus: Die Irrlichter. Abgerufen am 23.01.2026 von <https://www.textopus.de/poems/20572>)